



СТРАТЕГИЯЛЫҚ ТҰРАҚТЫЛЫҚ БАРШАМЫЗ ҮШІН ӨЗЕКТІ



Мемлекет басшысы Қасым-Жомарт Тоқаев «Еуразия кеңістігіндегі орнықты даму және қауіпсіздік» конференциясына қатысып, сөз сөйледі.

Президент өз сөзінде бұрын-соңды болмаған геосаяси тұрақсыздық жағдайында дипломатия шешуші рөлге ие болғанын атап өтті.

– Геосаясат пен геоэкономикадағы түбегейлі өзгерістер, жаһандық деңгейдегі климаттық және демографиялық сын-кәтерлер, пандемияның жаңа қаупі, қарулану бәсекесінің өрши түсуі, технологиялық прогресс, соның ішінде жасанды интеллектіні енгізу жағдайында стратегиялық тұрақтылық пен орнықты даму мәселелері баршамаз үшін өзекті бола түсті. Бұдан шығатын қорытынды анық: халықаралық қоғамдастық

сындарлы диалогқа тың серпін беруі үшін күн тәртібіне оң өзгеріс жасауы қажет. Сондықтан біртұтас еуразиялық қауіпсіздік идеясы көппарлы, әділетті және орнықты әлемдік тәртіпті қалыптастыруға тұжырымдамалық негіз бола алады, – деді Қасым-Жомарт Тоқаев.

Бұдан кейін Мемлекет басшысы конференция қатысушыларына қоғамдық өмірдің барлық саласында жүзеге асырылып жатқан Қазақстандағы ауқымды өзгерістер жөнінде мәлімет берді. Қасым-Жомарт Тоқаевтың пікірінше, саяси реформалардың ең басты жаңалығы – Конституцияда Президент мандатын 7

жылдық бір мерзіммен шектеу туралы ережені бекітілуі.

– Мұндай норма посткеңестік елдердің, тіпті одан тысқары мемлекеттердің ешқайсысында жоқ. Менің ойымша, Президентті бір рет жеті жылға сайлау – оның сайлауалды бағдарламасы мен реформаларын жүзеге асыруға жеткілікті уақыт. Оған қоса, Президент – халық жалдаған мемлекеттік қызметкер. Елімізде Заң мен Тәртіп үстемдік құруға тиіс екеніне сенімдімін. Тек сонда ғана реформаларды жүзеге асыруға, сондай-ақ Қазақстан экономикасына инвестиция тартуға қажетті жағдай жасай аламыз. Заң мен Тәртіп – Әділетті Қазақстанның негізі. Әділдікке қашан да, қай жерде де мұқтаждық бар. Біздің елде де солай. Қолға алған реформаларды іске асыру қаншалықты қиын болса да, дiттеген мақсатымызға жетпей

қоймаймыз. Оны ешкім тоқтатпақ тұрмақ, бағытынан жаңылдыра алмайды, – деді Мемлекет басшысы.

Қасым-Жомарт Тоқаев Қазақстан мен Ресей халықтары арасындағы достық байланыстарды нығайтуда білім саласының маңызы зор екенін атап өтті. Президенттің айтуынша, қазір Ресейде 60 мыңнан астам қазақстандық студент оқиды.

– Бүгінде елімізде Ресейдің танымал жоғары оқу орындарының филиалдары табысты жұмыс істеп келеді. Қазақстанда Мәскеу мемлекеттік халықаралық қатынастар институтының филиалын ашу жоспарланып отыр, – деді Қасым-Жомарт Тоқаев.

Пленарлық отырыста Ресей Президентінің көмекшісі Владимир Мединский конференция қатысушыларына Владимир Путиннің сәлемін жеткізді.

Мәскеу мемлекеттік халықаралық қатынастар институтының ректоры Анатолий Торкунов оқу орнының 80 жылдығына орай осынау іс-шараны ұйымдастырғаны үшін Қазақстан тарапына алғыс айтты.

– Біз конференция тақырыбын кездейсоқ таңдаған жоқпыз. Мұның аясында экономика және қауіпсіздік саласындағы көпжақты ынтымақтастықтың дәстүрлі мәселелері климаттық күн тәртібіндегі жаңа сын-кәтерлермен, сондай-ақ Еуразия кеңістігінде энергетика және көлік инфрақұрылымын дамытудың жай-жапсарымен бірге қаралды, – деді Анатолий Торкунов.

Жиынға Қазақстан мен Ресейдің көрнекті ғалымдары, дипломатиялық қызмет ардагерлері, мемлекеттік органдар мен мекемелердің басшылары, саясаттанушылар және жастар ұйымдарының өкілдері қатысты.

БҮГІНГІ НӨМІРДЕ:

ҒЫЛЫМИ ӘЛЕУЕТТІ НЫҒАЙТАТЫН ҚАДАМ

Қазақстанда атом электр стансасының (АЭС) құрылысы – бұл қоғамда көптеген пікірталас туғызатын маңызды және көпқырлы мәселе. АЭС салу туралы сөз болғанда халықтың басты мәселелерінің бірі – қауіпсіздік екені даусыз.



→ 4

ЖАТ ЖҰРТТА ЖАБЫҚҚАН ЕҢБЕКШІГЕ КІМ ҚОРҒАН?

«Өз елінде еңбек етпей, шетелге кететіндерді қолдаудың қажеті қанша?» деген сауал туындауы мүмкін. Сарапшылардың түсіндіруінше, біріншіден, кез келген мемлекет өз азаматтарын кез келген жерде, соның ішінде шетелде де қорғауға міндетті.



→ 5

ХАЛЫҚТЫҚ ШТАБ: АЭС – ЭНЕРГЕТИКАЛЫҚ ҚАУІПСІЗДІГІМІЗДІҢ КЕПІЛІ

АЭС салуды қолдау жөніндегі Халықтық штаб өңірлерде тұрғындармен кездесуді жалғастыруда. Штаб мүшелері Көкшетау қаласында құтқарушылармен, еңбек ұжымдарымен, медицина саласының қызметкерлерімен және ардагерлермен АЭС-тің артықшылығы туралы әңгімелесті.

Полимерден жұмсақ қаптама шығаратын «Новопэк» ЖШС зауытының еңбек ұжымымен кездесуде штаб мүшелері өнеркәсіптік кәсіпорындардың жүйелі жұмыс істеуі үшін сенімді және тұрақты энергиямен жабдықтаудың маңызы туралы әңгімелесті. Мәжіліс депутаты, «AMANAT» партиясы фракциясы жетекшісінің орынбасары Павел Казанцев АЭС – жаңа жоба ғана емес, бұл инвесторларды тартуға және жаңа жұмыс орындарын ашуға қажет ұзақмерзімді шешім екенін атап өтті.

→ 3



АЭС САЛУДЫ
ҚОЛДАУ ЖӨНІНДЕГІ
ХАЛЫҚТЫҚ ШТАБ



6 қазан

АЭС-КЕ ДАУЫС БЕР!

WWW.AES2024.KZ

1 ҚАЗАН 2024 | СЕЙСЕНБІ

СЕНАТ



ОТЫРЫСТЫҢ КҮН ТӘРТІБІН БЕЛГІЛЕДІ

Сенат Төрағасы Мәулен Әшімбаев палата бюросының отырысын өткізді. Онда депутаттар 3 қазан күні өтетін Сенат отырысының күн тәртібін белгілеп, палатаның алдағы іс-шараларын пысықтады.

Алдағы бейсенбіде сенаторлар «Биологиялық материал алмасу туралы келісімді ратификациялау туралы» заңды қарайды. Құжаттың нормалары жануарлардың жұқпалы ауруларының таралуын болдырмауға, аса қауіпті аурулардың зертханалық диагностикасын жетілдіруге, сондай-ақ микроорганизмдердің (штамдардың) ұлттық коллекцияларын

толықтыруға және Келісімге қатысушы мемлекеттердің аумақтарын эпизоотиядан қорғауға бағытталған.

Сонымен қатар аталған халықаралық құжатта тараптардың эпизоотиялық ахуалы мен ғылыми мүдделерін ескеретін аккредиттелген және референттік зертханаларда биологиялық материалға зертханалық зерттеулер

жүргізу қарастырылады. Материалды іріктеу, қаптау және тасымалдау халықаралық стандарттарға, оның ішінде Дүниежүзілік жануарлар денсаулығын қорғау ұйымының ұсынымдарына сәйкес іске асырылады.

Сондай-ақ бюро отырысында Мәжілістен келіп түскен заңдар жұмысы үшін тұрақты комитеттерге бөлініп берілді.

ДӘНДІ ДАҚЫЛДЫҢ ДЕНІ ЖИНАЛДЫ



Вице-премьер Серік Жұманғариннің төрағалығымен өткен егін жинау науқаны бойынша жедел штабта жиын-терімді үздіксіз жүргізу үшін фермерлерді барлық қажетті құралдармен қамтамасыз ету мәселесі қаралды.

Ауа райының қолайлы болуының арқасында 27 қыркүйектегі жағдай бойынша Қазақстанның негізгі астық егетін өңірлерінде 13 млн гектарға жуық алқап немесе 75%-ы жиналды. Егін жинау науқанын қазан айының соңына дейін аяқтау жоспарланған. Қазір майлы дақылдарды жинау жүргізілуде.

Өнімді кептіру агрегаттары үшін арзандатылған дизель отыны мен сұйытылған газды тиіп, жөнелту және 4-сыныпты арпа мен бидайдың бағасы – жедел штаб отырысында қаралған негізгі мәселелер болды.

Ауыл шаруашылығы вице-министрі Азат Сұлтанов хабарлағандай, 27 қыркүйекте элеваторларға 3,376 млн тонна астық түсті, оның 2,476 млн тоннасы – бидай. Бидайдың жалпы көлемінде 1,4 млн тоннасы 3-сыныпты бидай (56,2%), 701,4 мың тонна – 4-сыныпты (28,3%), 263,1 мың тонна – 5-сыныпты (10,6%) астық. Камбаға

түскен арпаның 95%-ға жуығы – 2-сыныпты арпа.

4-5-сыныпты бидай жинауды ұлғайту перспективасын ескере отырып, шаруалар осы астықтың форвардтық сатып алу бағасын мүмкіндігінше ерте жариялауды сұрап отыр. Серік Жұманғарин Азық-түлік корпорациясына келесі аптада форвардтық сатып алу бағасын жариялауды тапсырды.

Негізгі астық егетін өңірлерге астық кептіру агрегаттарының жұмысы үшін арзан бағада сұйытылған газ жеткізу басталды. Өнімді жинап, кептіруге қажетті дизель отынын тиіп жөнелту жоспарға сәйкес жүргізілуде.

Күзде топыраққа енгізу үшін қажетті минералды тыңайтқыштарды жөнелту барысы жеке қарастырылды. Жалпы жоспардың 84%-ында жөнелту төмен қарқынмен жүріп жатқан өңірлер бар. Вице-премьер шаруалар тыңайтқыштарды уақытында қолдану үшін жұмыс үдерісін жеделдетуді тапсырды.

МӘЖІЛІС

СЫБАЙЛАС ЖЕМҚОРЛЫҚ МӘСЕЛЕЛЕРІН ҚАЙТА ҚАРАЙДЫ

Палата Спикері Ерлан Қошановтың төрағалығымен бюро отырысы өтіп, онда алдағы жалпы отырыстың күн тәртібі нақтыланды.



Мәжілістің жалпы отырысында Қазақстан Республикасының кейбір заңнамалық актілерін Конституция нормаларына сәйкес келтіруге бағытталған заң жобасы бірінші оқылымда талқыланады. Конституциялық сот «Сыбайлас жемқорлыққа қарсы күрес туралы» заңның 13-бабын Конституцияға қайшы келеді деп тапты. Мемлекеттік функцияларды орындауға уәкілеттік берілген адамдарға теңестірілген тұлғаларға қатысты қолданыстағы сыбайлас жемқорлыққа қарсы шектеулер олардың құқықтарын бұзатыны анықталды. Осыған байланысты заң жобасында

сыбайлас жемқорлыққа қарсы шектеулер мәселелерін реттейтін түзетулер енгізу көзделген.

Сондай-ақ депутаттар сотталған адамдарды беру туралы Қазақстан-Вьетнам арасындағы шартты ратификациялау туралы заң жобасын да қарайды. Құжат бас бостандығынан айыру жазасына кесілген адамдарды өз азаматтығы бар мемлекетте жазасын өтеу үшін елдер арасындағы қарым-қатынастарды реттеуге бағытталған. Сонымен қатар жалпы отырыста палата комитеттері бірқатар халықаралық шартты ратификациялау туралы заң жобаларын жұмысқа қабылдайды.

ҮЙЛЕСТІРУ КЕҢЕСІ ҚҰРЫЛДЫ

Елімізде су секторын дамыту бойынша серіктестердің Үйлестіру кеңесі құрылды. Оған Су ресурстары және ирригация министрлігінің, БҰҰ Даму бағдарламасы (БҰҰДБ) мен халықаралық ұйымдардың, қаржы институттарының, донорлық қауымдастықтардың және басқа да бірқатар құрылым өкілдері кіреді.

Кеңес министрліктің, халықаралық ұйымдардың және донорлық қауымдастықтың күш-жігерін үйлестіре отырып, елдегі ұзақмерзімді экологиялық тұрақтылық пен экономикалық дамуды ілгерілетуде маңызды рөл атқарады. Үйлестіру кеңесі ресурстарды жұмылдыруға, басқаруды нығайтуға, өңірлік ынтымақтастықты кеңейтуге және су ресурстарын басқаруда тұрақты тәжірибелерді ілгерілетуге ықпал ететін болады.

«Бір жыл бұрын бұл салада жаңа министрлік құрылды. Осы уақыт ішінде негізгі үш бағытта жұмыстарды атқардық. Біріншіден, жаңа құқықтық базаны қалыптастыруға екіпін қойылды. Парламент Мәжілісінде Су кодексінің жобасы қаралып жатыр және жылдың аяғына дейін осы құжат қабылдануы мүмкін. Сонымен қатар су ресурстары бағытында 2024-2030 жылдарға арналған тұжырымдаманы бекіттік. Атап айтқанда, саладағы жұмыстарды жүзеге асыру үшін бүгін

елордада Су секторын дамыту бойынша серіктестердің үйлестіру кеңесінің бірінші отырысын ұйымдастырдық», – делі Су ресурстары және ирригация министрі Нұржан Нұржігітов елордада өткен жиында тілшілер сұрағына жауап бере отырып.

Үйлестіру кеңесінің негізгі міндеттеріне тоқталсақ, ұлттық басымдықтарға сәйкес, мемлекеттік органдардың, БҰҰДБ, халықаралық қаржы ұйымдары мен донорлық қауымдастықтың келісілген іс-қимылын қамтамасыз ету ескерілген. Кеңес алға қойылған мақсаттарға жету үшін қаржы әрі техникалық ресурстарды жұмылдырумен және тиімді бөлумен айналысады. Су ресурстарын басқару саласында озық халықаралық тәжірибе мен инновациялық шешімдерді енгізу қарастырылып отыр. Кеңес аясында суды басқару саласындағы өңірлік ынтымақтастықты нығайту қамтылған.



